

## Pauluni Dakani jaura Ephesalani

<sup>1</sup> Paululu Jesuni Christuni Apostel Godaia jertapaterinandru, kulikirilani, tana Ephesungu ngamai, ja tanali Christungu Jesungu morlalu ngundrai.

<sup>2</sup> Manju jurangunto nganaiatimai, ja murla Goda ngaianani Ngaperandru, ja Kapara Jesu Christungundru.

*(Dakani jaura Thomas ditjini)*

<sup>3</sup> Jurakokana nganaiatimai Godani ja ngaiananaia Kaparaia Jesuni Christuni Ngaperani, Nulia ngaianana murlali ngankana wonti Jaolaia murlalali pratjanali pariwilpani Christungundru,

<sup>4</sup> Worderu Nulia ngaianana nunkangu kalkalkana wonti, windrila mita pantjimanani, ngaiana kulikiri ja madlentji pani nganananto nunkangu mudlani:

<sup>5</sup> Ja Nulia ngaianana ngantjanali ngopera kurana wonti nunkani kupaia Jesu Christungundru nunkangu, nunkanaia jertapaterinaia ngantjanandru,

<sup>6</sup> Nunkani manjula pirnalaia jurakokanaia, nunkanali Nulia ngaianana manju ngankana wonti Ngantjaluni;

<sup>7</sup> Nunkangundru ngaiana kulkani ngamalkai kumarali nunkanali, jenia nganai madlentjaia kalingana, nunkani manjulaia poto pirnandru,

<sup>8</sup> Ninaia Nulia ngaianangu pirna nangana wonti kirilani ja ngujamanani pilki ja pilkini;

<sup>9</sup> Ja Nulia ngaianangu nunkanaia jertapaterinaia kuru-  
rururula tinkari ngankana wonti nunkani ngantjanandru,  
ninaia Nauja munta kuraterina wonti,

<sup>10</sup> Tanali ninaia kaukaubananto, miljaru matja manamiri pantjina, ngangau Nulia warupoto Christungu mangatandra kulnuni ngokananto, mina pariwirpani ja mina mitani nganai nunkangu.

<sup>11</sup> Nunkangundru ngaiana maratunka potomanina wonti, ngangau Nulia ngaianana ngopera kurana wonti nunkani kuraterinandru, Nulia warupoto ngankainunkanaia jertapaterinaia ngundranandru,

<sup>12</sup> Ngaiana nganananto nunkanaia pirnalaia jurakokanaia; ngaiana ngopera kalkana wonti Christungu,

<sup>13</sup> Nunkangundru bakana jura jaura morlalu matja ngarana, jurani kulkanaija ngantjani jaura, nunkangundrubakana jura morlalu ngundrana wonti, ja talpadakani jauraija Jaola kulikirieli malka morlalu manina wonti,

<sup>14</sup> Naupini ngaiananaia maratunkaia mindrani potonganai potuja kupaia kulkanaija, nunkani pirnalaia jurakokanaia.

<sup>15</sup> Jendrangundruja bakana ngato, ngato matja ngarana jurani morlalu ngundranandru Kapara Jesungu, ja jurani ngantjanandru kulikiri pratjanani,

<sup>16</sup> Wata mudai jurangundru jurakokala, ja ngato jurana ngundrai ngakani ngatjinani,

<sup>17</sup> Ngaiananaia Kaparaia Jesuni Christuni Glodali, pirnalaia Ngaperali jurangu kirilaia ja tinkari ngankanaia Jaola jinkinanto, ninaia munta ngujamala,

<sup>18</sup> Jurani ngaraia milki tjenmara nganananto, jura ngujananto, mina nunkanina karkanaia kalkana nganai, ja mina nunkanina maratunka potopirnaia pirnalaia kulikirini nganai;

<sup>19</sup> Ja mina nunkanina ngurulaia pirnala pirna nganai ngaianangu, ngaiana morlalu ngundrai, nunkanina ngurulaia pirnalaia ngankanandru,

<sup>20</sup> Ninaia Nulia ngankana wonti Christungu, Nulla ninaia narindru jiritjibana wonti, ja ninaia nunkangu ngunarani ngamipana ngarina wonti pariwilpani,

<sup>21</sup> Kapara pratjanani, ja ngurulani ja pirnalani ja kaparani, ja tala pratjanani, tanali tanana dikai, wata windri nunkangupini mitani, a-ai, bakana nunkangu, nau wokarananto.

<sup>22</sup> Ja warupoto Nulia nunkangu tidna ngalpani kurana wonti, ja ninaia warupotuja mangatandra kurana wonti mili wolarani,

<sup>23</sup> Tanapini nunkani palku nganai nunkanaia manamirila, Nulia warupoto warupotuni manamiri ngankai.

## 2

<sup>1</sup> Bakana jurana, jura nari nganana wonti dankaranali ja madlentjali juranali,

<sup>2</sup> Tanangupini jura warula wirarina wonti nunkangupini mitaia miljarani, ja ngaralanaia ngurulaia kaparani pankinani, nunkanaia jaolani, nulia karari ngankai delkinietjaia ngatamurani,

<sup>3</sup> Tanangupini bakana ngaiana warula wirarina wonti kana womalaia milkirinani, jeruja ngaiana kana womalaia ja ngundranaia jertapaterina ngankana wonti, ja tiria kupa dankanandru nganana wonti nguruni jeribaka,

<sup>4</sup> Windri Godali, Nauja poto pirna nganai kalumiltjamiltjarinani, nunkani ngantjana pirnandru, minalin-unkanali Nulia ngaianana ngantjana wonti,

<sup>5</sup> Ngaianana, ngaiana dankaranali matja nari, Christungu jela tepi ngankana wonti. (Manjulali jura tepi pantjina warai),

<sup>6</sup> Ja Nulia ngaianana nunkangu jela jiritjibana wonti ja jela pariwilpani kurana wonti Jesungu Christungu,

<sup>7</sup> Nulia miljarani, nau wokarai, nunkanaia manjulaia poto pirna manamiri ngaiyanangu wondrananto maltieli Jesungu Christungu.

<sup>8</sup> Manjulali jura tepi pantjina warai morlalu ngundranali, ja jenia wata jurangundru, a-ai, Godaia jinkini poto nauja nganai,

<sup>9</sup> Wata ngankanandru, ngangau wata kulno jurakokaterinanto.

<sup>10</sup> Ngangau ngankani nunkani ngaiyana nganai, Nulia ngaiyanana pantjimana wonti Christungu Jesungu ngankana ngumuja, tanana Godali ngopera ngankingana wonti, ngaiyana tanangu wirarinanto.

<sup>11</sup> Jendrangundruja mangatandra wilparianau, jura warula kana ko palkujeli nganana wonti, ja karuwalila, marali matja pantjina, jurana karuwalila pani dikana wonti,

<sup>12</sup> Jura jendranguka miljarani Christus pani nganana wonti, Israelalani nguralani worita ja talpadakanaia Testamenlani tula, kalkani pani ja Goda pani mitani ngamana wonti.

<sup>13</sup> Karari jura, warula matja worita nganana, Christungu Jesungu karakara wokarana warai Christuni kumarali.

<sup>14</sup> Ngangau Nauja murla ngaiyanani nganai, Nulia wulana kulnuni ngankana wonti, ja wondiri terti wokaribana wonti,

<sup>15</sup> Ngangau Nulia nunkani palkujeli talpala walto ngankana wonti, jenia nganai jirijiribani jaura, Nulia wulangundru kana marra kulno nunkangu pantjimananto, ja murla ngankananto;

<sup>16</sup> Ja Nulia wulana murlali ngankananto Godangu palku kulnujeli kunarkujeli, ja talpala nari ngankana wonti nunkangu;

<sup>17</sup> Ja Nauja wokarana wonti ja murla kaukaubana wonti, jurangu worita ja murla tanangu karakara;

<sup>18</sup> Ngangau nunkangundru ngaiana mana walto ngamalkai Ngaperaia Jaola kulnuni.

*(Dakani jaura Philippuni ja Jakobuni ditjini)*

<sup>19</sup> Jeruja jura wata morla tula ja ngandrani nganai, a-ai, kulikiria jelangurala ja Godaia pungala,

<sup>20</sup> Matja wotina Apostelaia ja Prophetaia wondirani, nunkani marda kapara Jesus Christus munta nganai,

<sup>21</sup> Nunkangupini wotini pratjana matja ngokana, ja punkai Godaia punga kulnuja, nauja kulikiri nganai, Kaparani,

<sup>22</sup> Nunkangu Nulla bakana jurana wotina ngokai Godaia pungaia Jaolani.

### 3

<sup>1</sup> Jendrangundruja ngato Paululu Jesuni Christuni kangangarila nganai, jurangu kana koni.

<sup>2</sup> Jura matja ngaranani Godaia manjulaia ngamalkijiribanandru, ninaia Nulia ngakangu jinkina wonti jurangu.

<sup>3</sup> Worderu Nulia ngakangu ngaramarlali tinkari ngankana wonti kurukurula, worderu ngato ngopera ngalje dakana warai;

<sup>4</sup> Jura jenia warapanani, jura ngujamananto ngakani ngujamana Christuni kurukurulanl.

<sup>5</sup> Ninaia Nulia kanaia

<sup>6</sup> Kana ko jelamaratunkaia maninietja nganai, ja palku kulnurina ja talpadakanaia jelali maninietja Christungu Jesungu ngantjani jaurali.

<sup>7</sup> Nunkanipini mili ngani pantjina wonti Godaia manjulaia jinkini potundru, ninaia Nulia ngakangu jinkina wonti nunkanaia ngurulaia ngankanandru.

<sup>8</sup> Ngakangu, ngani morla waka nganai kulikiri pratjanani, Nulia ninapini manjula jinkina wonti, kana koni Christuni poto pirna manamiri kaukaubala;

<sup>9</sup> Warupoto tjenmara ngankala, mina kurukurulaia ngamalkijiribani nganai, nauja kurukuru nganana wonti nguralindru nunkangupini Godani, Nulia warupoto pantjimana wonti Jesu Christujeli,

<sup>10</sup> Ngangau karari kaparali ja ngurulali pariwilpaia ngalpani ngujamananto mili wolarali Godaia kirila pilki ja pilki,

<sup>11</sup> Worderu Nulia ngurali jertapaterina wonti, ninaia Nulia kantji ngankana wonti Christungu Jesungu nganianani Kaparani;

<sup>12</sup> Nunkangupini ngaiana mankina ngamalkai, ja mana walto murlali morlalu ngundranali nunkangu.

*(Dakani jaura G. D. 16 Trinitatis)*

<sup>13</sup> Jendrangundruja ngani ngatjiai, ngani wata walturianto ketjaketjanani ngakanani jurangu, ngangau jenia jurangu pirnala nganai.

<sup>14</sup> Jendrangundruja ngani pantja ngakani ngarila wapaia ngaiananaia Kaparaia Jesuni Christuni Ngaperani,

<sup>15</sup> Nunkangundru warupoto, mina ngaperi ngamalkai pariwilpani ja mitani tala ngamalkai,

<sup>16</sup> Nulia jurangu nunkani pirnalaia poto pirnandru jinkinanto ngurulani ngurunguru pantjila Jaolali nunkanali kanani mandrani,

<sup>17</sup> Christus morlalu ngundranali jurangu ngarani ngamananto, jura ngantjanani kapararinanto ja ngurungururianto,

<sup>18</sup> Jura kulikiri pratjaterinani jela ngurunguru pantjinanto patala, mina maru ja wirdi ja mikari ja miri nganai,

<sup>19</sup> Ngujamala Christuni ngantjana, nauja morla pirna nganai ngujamanani warupotuni, jura Godaia manamirieli pratjanali manamiri pantjinanto.

<sup>20</sup> Ja nunkangu, Nauja ngurunguru nganai morla pirna ngankala warupotuni, mina ngaiana ngatjiai kara

ngundrai kara nunkangupini ngurujeli, nunkanali Nulia ngaianangu ngankai.

<sup>21</sup> Nunkangu pirnala nganaiatimai mili wolarani Christungu Jesungu nguja warupotuja nguralhidru nguralia! Amen.

## 4

*(Dakani jaura G. D. 17 Trinitatis)*

<sup>1</sup> Ngato kanjanganilali Kaparani, jurana kurukurubala wapaia, jura talku wirarinanto jurani karkanani, minalin-unkanali Nulia jurana matja karkana,

<sup>2</sup> Waka ngundraterinali ja malti pratjanali, ja manjujeli jura mandramalinanto ngantjanani.

<sup>3</sup> Ja jigleri ngananau Jaolaia kulnuni ngamalkala murlaia karanali,

<sup>4</sup> Palku kulno ja Jaola kulno, worderu Nulia jurana bakana karkana wonti jurani karkanaia kalkani kulnuja;

<sup>5</sup> Kapara kulno, morlalu ngundrana kulno, multibanila kulno;

<sup>6</sup> Goda kulno ja Ngaperi warupotuja, Nauja warupotuni miri ja warupotuni jela ja warupotuni nganai.

<sup>7</sup> Pratjanani ngaianangu Nulia jinkina wonti manjula, worderu Christuni jinkini kurana wonti.

<sup>8</sup> Jendrangundruja Nauja jatai: “Nauja miri tarana wonti ja kanjanganila dupudupu wapalkana wonti ja kanani poto jinkina wonti,”

<sup>9</sup> Jenia: “Nauja tarana wonti” wondrai, Nauja bakana ngarina wonti mita pirini ngarinalu.

<sup>10</sup> Nauja matja ngarina Naupini nganai, Nauja bakana tarana wonti morla miri pariwilpa pratjanani, Nulia warupoto manamiri ngankananto.

<sup>11</sup> Ja Nulia muntali jinkina wonti palpa Apostel, palpa Propheta, palpa ngantjani jaura kaukaubanietja, palpa ngamalkanietja, palpa ngujangujara jinkinietja nganala,

<sup>12</sup> Kana kulikiri ngankingala ngankani ngamalkijirib-anaia, Christuni palkuni wotinaia.

<sup>13</sup> Ngaiana pratjana wokaranantulu morlalu ngundrana kulnuja ja Godaia Ngatamuraia ngujamanaia, ja materi pirnaia, ja Christuni manamirila pirnaia.

<sup>14</sup> Ngaiana wata morla kupa jeribaka nganananto, tanana ngujangujara watarali pratjanali wijawijabai ja tertabai kanaia jedibanali ja tjautjauja kirieli karkarkanaia.

<sup>15</sup> A-ai, ngaiana morlalu nganananto ngantjanani ja potu warupotuni punkananto nunkangu, Nauja mangatandra nganai, Christus;

<sup>16</sup> Nunkangundru palku warupoto ngumu ngokana ja manduribana warai marangokijiribamalini pratjanali, worderu buru pilki ja pilkieli ngankai palku pirnarinanto nunkani wotinaia ngantjanali.

<sup>17</sup> Jenia ngani jatai, ja Kaparani morlalu kurai, jura wata morla wirarinanto kana koni jeribaka tanani tjuru tjautjauni;

<sup>18</sup> Tanani tjuru ngalpuru nganai, tana Godaia tepini worita nganai kondru, nauja tanangu parai, ja tanani ngara ngurungurundru.

<sup>19</sup> Tana burka pani pantjina wonti, ja tjikatjikani jinkiterina wonti murumuru pratjana ngankala ngukingukipaterinani.

<sup>20</sup> Jura wata jeruja Christus kiririna wonti.

<sup>21</sup> Jura nunkangundru matja ngarana ja nunkangundru matja ngujangujara manina, worderu morlalula Jesungu nganai.

*(Dakani jaura G. D. 19 Trinitatis)*



<sup>22</sup> Jura dukaraterianau, worderu jura warula wirarina wonti, kana womala, nauja jedibanaia milkirinali munta taripateriai;

<sup>23</sup> Ja marraribaterianau Jaolali jurani tjuru,

<sup>24</sup> Ja kana niarra widmaterianau, ninaia Godali nunkangu jeribaka pantjimana wonti talkuni ja kulikirini morlalulaia.

<sup>25</sup> Jendrangundruja jedi jaura woranau, ja jaura morlalu jinkimalianimai pratjanani ngurulani, ngangau ngaimana pratjaterina palku buru nganai.

<sup>26</sup> Wata kuterianau, ja wata madlentji ngankanau; jura wata kuterinanto ditji wirinantulu.

<sup>27</sup> Bakana wata piri jinkianau kutjini.

<sup>28</sup> Warle ngopera kurieli maninala, wata morla kurieli maninanto, a-ai, nulu marali nunkanali ngumu ngankananto, nulu muntali ngamalkananto wangiwangini jinkila.

<sup>29</sup> Jaura tunka wata jurani manandru dunkananto, a-ai windri wotinaia mina ngumu nganai, nulu manjula jinkinanto ngaranietja worangu.

<sup>30</sup> Ja wata Jaola kulikiri ngaurongauro ngankanau, nunkanali jura matja dantjamana kulkani ditjia.

<sup>31</sup> Kaldri, ja tirijiritjina, ja tiri, ja maritjina, ja ngirkibana pratjana jurangundru woranau madlentji pratjanani jela.

<sup>32</sup> Murlali ngamangamaranau, kalumiltjamiltjarilkijiribamalianimai, madlentji worijiribamalianimai, worderu bakana Godali jurangu Christungu kalingana wonti.

<sup>1</sup> Jeruja Godangu karipaterini pantjianau kupa ngantjalu jeribaka.

<sup>2</sup> Ja ngantjanani wirarianau, worderu bakana Christulu jurana ngantjana wonti, ja munta jinkiterina wonti ngianangundru jinkiterini pototo ja pototo ngumu Godani kuli ngumuja.

<sup>3</sup> Palakantji ja murumuru pratjana ja ngukingukibaterina jurangu wata talarinanto, worderu jenia kana kulikirini talku nganai.

<sup>4</sup> Jeruja bakana wata ninta pani ja jildiui ja kangirini, jenia wata ngumu nganai, a ai, morla ngumu jurakokana.

<sup>5</sup> Ngangau jenia jura milkila, palakantjieli kara, murujnuruja kara ngukingukibaterinietjali kara, nau muramurani wodatarana ngamai, wata maratunka ngamalkai Christuja ja Godaia mililani.

<sup>6</sup> Wata kulnujeli jurana jedibananto jaura bakujeli; ngangau jendrangundruja Godaia tirila delkinietjaia ngatamurani wokarai.

<sup>7</sup> Wata tanani kamaneli pantjianau!

<sup>8</sup> Jura warula ngalpuru nganana wonti, ja karari jura praitji nganai Kaparali.

<sup>9</sup> Praitjaia kupa wirarianau! Ngangau praitjaia tandra ngumu pilkipilki ja talku ja morlalu nganai.

<sup>10</sup> Ja wontjanau mina Kaparali ngantjai.

<sup>11</sup> Ja wata jelarianau ngalpurai ngankanani, tanali tandra pani mandrai, a-ai, tanangu kalakalarianau!

<sup>12</sup> Ngangau mina tanali kurukuru ngankai, jenia bakana ninta nganai jatala.

<sup>13</sup> Jenia pratjana, minani dikidikibani parai, praitjali tinkari ngankai; ngangau pratjana, mina tinkari nganai, praitji nganai.

<sup>14</sup> Jendrangundruja dakanala parai: “Tepiriau jidni mukaetja, ja narindru jiritjiau, jeruja Christus jinkangu mintjila nganai.”

*(Dakani jaura G. D. 20 Trinitatis)*

<sup>15</sup> Jeruja najianau, worderu jura talku wirarinanto, wata kana patipatini, a-ai, kana kirini jeribaka.

<sup>16</sup> Ja ditjini juranani jigleri ngananau, ngangau ditji madlentji nganai.

<sup>17</sup> Jendrangundruja wata ko, a-ai, kiri pantjianau, mina Kaparaia jertapaterina nganai.

<sup>18</sup> Ja wata wainali parawaranau, jura tjikatjika pantjiati, a-ai, manamiri pantjianau Jaolali.

<sup>19</sup> Ja ngankamalianau psalmali ja jurakokani wimali ja Jaolaia wimali, ja wonkanau ja jadijadibanau Kaparani jurani ngarani;

<sup>20</sup> Ja milingeru jurakokanau warupotundru Goda ja Ngaperi, ngaiananaia Kaparaia Jesuni Christuni talani.

<sup>21</sup> Ja wodatarana ngamalkijiribamalianimai Christungundru japali.

<sup>22</sup> Jura widla, jurani materani wodatarana ngamanau Kaparani jeribaka,

<sup>23</sup> Ngangau materi widlaia mangatandra nganai, worderu bakana Christus mili woloraia mangatandra nganai, ja Nauja palkuja Kulkanipirna nganai.

<sup>24</sup> Worderu mili wolara Christungu wodatarana ngamai jeruja bakana widla tanani materani, warupotuni.

<sup>25</sup> Jura materi, jurani widla ngantjanau, worderu bakana Christum mili wolara ngantjana wonti ja munta tanangu jinkiterina wonti.

<sup>26</sup> Nulia tanana kulikiri ngankananto, Nulia tanana matja kulirkana warai multibani ngapali jaurani.

<sup>27</sup> Nulia nunkangu munta mili wolara ngumu terkibananto murumuru pani ja karpakarpa pani, ja jenipara

pilki kara pani, a-ai, tana kulikiri ja madlentji pani ngamananto.

<sup>28</sup> Jeruja bakana materi wilpa nganai tanani widla ngantjala, tanani palku munta jeribaka. Warle widla nunkani ngantjai, nau munta ngantjateriai.

<sup>29</sup> Wata kulnujeli pota kulno nunkani palkuni kalakalarina wonti, a-ai, nulu nunkangu buka jinkiai ja ngumu ngamalkai, worderu bakana Christulu mili wolara,

<sup>30</sup> Ngangau ngaiana nunkanaia palkuja buru nganai, nunkani palkundru ja nunkani mokundru.

<sup>31</sup> Jendrangundruja kana kulnujeli ngaperi nunkani ja ngandri nunkani worarala nganai ja widlani nunkanani ngokala nganai, ja pudla palku kulno nganala nganai.

<sup>32</sup> Naupini kurukurula pirna nganai; ngani jenia jatai Christungundru ja mili wolarandru.

<sup>33</sup> Bakana jura pratjana pilki ja pilkieli, widla nunkani jeruja ngantjananto munta jeribaka. Widla materandru japali nganananto.

## 6

<sup>1</sup> Jura kupa worajai, jurani ngaperani ja ngandrini pankianau Kaparani; ngangau jenia talku nganai.

<sup>2</sup> Ngaperi jinkani ja ngandri jinkani pirna ngundraniai, nauja jirijiribani jaura ngopera nganai talpadakani jaurali:

<sup>3</sup> Jidni tepi ngumu ngamananto, ja jidni juri mitani ngamananto.

<sup>4</sup> Ja jura ngaperi worajai, jurani kupa wata dilpanau tiria, a-ai, tanana kiri ngankanali ja Kaparaia kurukurubanali pirna ngankanau.

<sup>5</sup> Jura mili worajai, palkuja kaparani juranani pankianau japali ja ngaranali juranaia ngaraia kulnongundranali Christungu jeribaka,

<sup>6</sup> Wata windri milkini ngankanau kana murlali ngankala jeribaka, a-ai, Christuni milieli jeribaka Godaia jertapaterina ngankanau ngarali,

<sup>7</sup> Ja manjujeli mili ngananau Kaparani jeribaka, ja wata kanani,

<sup>8</sup> Ngangau jura milkila, minakulno kulnujeli ngumu ngankanani kara, nulu ninaia nakaldra manila nganai Kaparandru, nau mili nganai kara kurakanila kara.

<sup>9</sup> Ja jura kapara worajai, jenia bakana jura tanangu ngankanau, ja dikidikibani jaura woraranau, ngangau jura milkila, jurani ja tanani Kapara pariwilpani nganai, ja Nulia wata kana mudla ngundrai.

*(Dakani jaura G. D. 21 Trinitatis)*

<sup>10</sup> Ngatata ngakani worajai, ngurungururianau Kaparani ja ngurulani nunkanani.

<sup>11</sup> Godaia tirimalini poto widmaterianau, jura tataura terkananto kutjia tampanani;

<sup>12</sup> Ngangau ngaiana wata windri palkuni ja kumarani tirimalinanto, a-ai, kaparani ja ngurulani, nunkan-gupini ngalpuraia mita kaparani, tjikatjikaia kutji worani ngaranani.

<sup>13</sup> Jendrangundruja Godaia tirimalini poto patanau, jura ditjini madlentjani ngurunguru terkananto, ja prat-jana kalalu ngankananto ja terkananto.

<sup>14</sup> Jeruja terkanau, jurani kapa matja ngampina mor-lalulali, ja matja widmaterina talkulaia marda katieli,

<sup>15</sup> Ja tidnani tidnaputa murlaia ngantjani jaurali matja ngankingana,

<sup>16</sup> Tanangu marapuni morlalu ngundranaia piramara patanau, nunkanali jura ngurunguru nganananto kutjia turukalti palimala,

<sup>17</sup> Ja tepia kapuluru patanau, ja Jaolaia mardakirra, jiaupini Godaia jaura nganai.

<sup>18</sup> Ja milingeru ngatjianau warupotuja ngatjinali ja karkanali Jaolani, ja tepi ngamanau wonki pirnali ja ngatjinali kana kulikirini pratjanandru.

<sup>19</sup> Ja ngakangundru, Nulia ngakangu jaura jinkinanto ngani mana piririnani manubakujeli kaukaubala ngantjani jauraia kurukurula,

<sup>20</sup> Nunkanipini mandra ngani nganai kanjanganrini, ngato nunkangu manubakujeli kaukaubananto, worderu ngani jatananto.

<sup>21</sup> Jura ngujamananto, worderu ngani ngamala wapaia, ja mina ngato ngankala wapaia, jenia pratjana jurangu Tychikulu kaukaubala nganai, nauja ngatata ngantjalu ja mii talku nganai Kaparani.

<sup>22</sup> Ninaia ngato jendrania jurangu jinpana warai, jura ngujamananto worderu ngaiiani ngamai, ja nulia jurana ngara ngankalkananto.

<sup>23</sup> Murla ngatata worani ja ngantjana morlalu ngundranali Goda Ngaperandru ja Kapara Jesu Christungundru.

<sup>24</sup> Manjula tanangu pratjanani nganaiatimai, tanali Kapara ngaianani Jesus Christus ngurali ngantjai! Amen.

TESTAMENTA MARRA

The New Testament in the Dieri language of Australia

Public Domain

Language: Dieri

Translation by: J. G. REUTHER, C. STREHLOW, jaura jinkmietja wulana

2019-08-20

---

PDF generated using Haiola and XeLaTeX on 14 Jun 2022 from source files dated 17 May 2022

1f85323a-0a8c-532b-9b6b-c58fa14656ec